

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

## **Johannis Segeri Weidenfeld De Secretis Adeptorum Sive Usu Spiritus Vini Lulliani Libri IV**

**Weidenfeld, Johann S.**

**Londini, 1684**

II. Menstrua Vegetabilia simplicia ex spiritu Vini phil. & Vegetabilius  
Oleosis

[urn:nbn:de:bsz:31-96282](https://nbn-resolving.org/urn:nbn:de:bsz:31-96282)

---

---

II. G E N U S.

*Menstrua Vegetabilia Simplicia ex Spiritu  
Vini Phil. & Vegetabilibus calidissimis,  
Herbis Floribus, Radicibus, &c.  
Oleos.*

5. Anima Metallica, seu Lunaria Coelica Lullii,  
*Descripta in Composit. Animæ Transmut. pag. 193.  
Vol. 3. Theat. Chym.*

**P**rimò scias, quòd Materia nostri Lapidis seu omnium Lapidum Philolophorum atque virtuosorum, qui per artificium generantur vel componuntur, est Anima Metallica, & menstruum nostrum rectificatum & acutum, seu Lunaria Coelica, quæ apud Philosophos vocatur Mercurius Vegetabilis, ortus à Vino Rubeo vel Albo, ut clarè patet, & clarè demonstratum existit divinitus revelatum in Figura individuum distinct. 3. Libri quintæ Essentiæ, &c.

Sed tamen Oportet priùs nostrum menstruum per Magisterium à morte, id est, sordibus Vini & Phlegmate extrahere per officium Alembici, & acuari in destillatione cum Vegetabilibus pertinentibus: quæ sunt, Apium Sylvestre, Squilla, Solatrum, Carduus, Oliandrum, Piper Nigrum, Euforbium, Viticella seu Flammula, & Pyrethrum, omnium ana & pulverisata. Ex altera parte ipsum menstruum roretur continuè spatio decem dierum in fimo calido aut Balneo Mariæ.

*Annotatiónes.*

**U**nctuosus Vini Phil. Spiritus non nisi unctuosus extrahit naturales Essentias Vegetabilium, ut inferias observabimus.  
*Libro*

*Libro de Medicamentis. Essentias ita extractas, ut & cætera Oleosa cruda sive expressa & destillata utriusque regni, Animalis & Vegetabilis, hic Vini Spiritus per simplicem digestionem dividitur in duas partes distinctas, duo Olea sive pinguedines, quarum una rei Essentia est, altera Corpus. Essentiam ita Confectam Spiritum Vini secundarium superius nominavimus. Essentiæ ambæ, hæc per divisionem, & illa per extractionem præparatæ per longiorem digestionem cum prædicto Vini Spiritu unum fiunt. Nam quæ unius & ejusdem sunt puritatis, & symbolica naturæ, commiscuntur faciliè & inseparabiliter; adeoque Essentia per Essentiam Confecta, eidem Essentiæ jungitur. Et si ulterius protrahamus digestionem, tandem pinguedinum alterutra, Corpus videlicet minus Oleosum, proptereaque relictum hæctenus, recipitur in naturam symbolicam, ob cujus admixtionem, non solum multiplicatur Spiritus, sed imò particulis hujus Corporis minus Oleosum ad ariditatem vergentibus, ad Aridorum dissolutiones aptior redditur, de quo modo agimus in dicto Recepto, cujus præscriptione Oleum ex Vegetabilibus Oleosis destillando unà cum Vini Phil. Spiritu prolectum, circulatur in Magisterium (sive Essentiam duplicem, naturalem & artificialem, de qua inferius suo loco) quo Spiritus Vini multiplicatur, & aridus magis homogeneus redditur. Idem extat Menstruum, sed Paulò aliter descriptum in Magia Naturali pag. 358. Sic,*

*℞. Nigrum nigrius nigro, & ex eodem decem vel octo partes destilla in vase vitreo, & in prima destillatione solum recipies dimidiam partem, hanc iterum destilla, & hujus recipe quartam partem, & tertiâ destillatione recipies quasi totum, & sic destilla illam partem usque ad octo vel novem vices, & erit perfecta, sed non rectificata nisi in vigesima secunda destillatione. ℞. Hujus aquæ partem quartam Libræ unius, & eandem acue destillando cum Vegetabilibus, quæ sunt Apium Sylvestre, & sic de cæteris aliis, de quibus dictum est supra in Anima transmutationis in Capitulo, quod incipit: Sed tamen oportet, &c. Et postea pone in vase Circulationis in fimo calidissimo, vel in Vinaria sub conservatione specierum. Quæ Aqua est etiam una de rebus, sine quibus nihil potest fieri in Magisterio hujus artis.*

*Menstruum, quod à morte Vini per Officium alembici extrahi, dictis Vegetabilibus neci, & tandem circulari debet, ipse Vini Phil.*

*Phil. Spiritus est, qui ita per hos exaltatur gradus, ut merito à Lullio vocetur materia omnium Lapidum Philosophorum & virtuosorum (id est, Lapidum pretiosorum) Anima Metallica & Lunaria Cœlica quæ etiam vocatur Mercurius Vegetabilis, ortus à Vino Rubeo vel Albo.*

*Materia, ex qua hoc conficitur menstruum, vocatur Vinum in priori Recepto: Oportet menstruum extrahere à morte Vini. Sed in posteriori vocatur Nigrum nigrius nigro. His duobus à Lullio tertium additur Synonymum pag. 1. Test. Novissimi. R. Vinum Rubrum, quod liquorem Lunariæ & Nigrum nigrius nigro vocamus. Per quæ Synonyma nemo nisi stolidus commune intelliget Vinum; communis enim ex hoc destillatus Spiritus ad talia & tanta perficienda omnino insufficientis est, imò omnia Arcana secretioris Chymicæ, quibus describendis insudamus, unico hoc verbo literaliter intellecto prostituta essent omnibus, per Vinum ergò intelligitur Philosophicum secretum, omnibus inexpertis absconditum.*

*Oportet extrahere à morte Vini per officium Alembici: id est, Oportet toties rectificare, donec fiat purissimus absque sordibus & Phlegmate Vini, quod mors Spiritus vocatur à Lullio. Purgatur, inquit, de tota sua superfluitate & Phlegmatica materia corruptibili, quæ ipsius mors est, & quæ mortificat suum Spiritum, qui potestatem habet vivificandi suam Terram; purgetur ergò & separetur ab eo Phlegma corruptibile per subtile ingenium, quod tibi dicam. Quare? quia si non benè purgetur, nunquam Terra ejus bene albificatur, nec fiet matrimonium inter Corpus & Spiritum. Et sic tunc ille Spiritus nominatus est Spiritus Lapidis, in Apertorio.*

*Rectificationis Methodus in priori Recepto omissa describitur in posteriori, ut & in Epistola accurtatoria. Hanc Vini Phil. rectificationem non intellexit Sendivogias, uti apparet ex Epistolarum suarum sexta. Brux. 25. Martii 1646. ubi sic: Secundus articulus Pagesiani operis, Domine sodalis, extrahendi & subinde præparandi Mercurii modum Mysteriosum, magis quam par fuit, ex Authoritate Lulliana malè intellecta, aliorumque præceptis Philosophorum malè applicatis repetere conatur, dum per destillationem decimam partem suæ magnesiæ primò ascendentem, quasi solam utilem & verè Mercurialem substantiam, novem verò reliquas partes per continuationem distilla-*

D

tionis

tionis prodeutes, ut inutiles ejici jubet, ad hoc ut tandem dicta decima pars asservata, Terræ residenti post completam destillationem (quam Terram Sal Sulphurque Mercurii ineptè autumant) restituatur, & per repetitas cohobationes, inhumationes, digestiones, & sublimationes ab ipso descriptas uniantur; sed graviter hallucinantur, nam quod tradunt Authores de parte denaria Spiritum continente, deque inhumationibus propria in Terra, aliò refertur quàm extractioni & præparationi Mercurii, ut alibi aliquando demonstrabitur, nec ulla est adhibenda regula dictæ extractioni, & præparationi Mercurii, præter simplicem destillationem Magnesiæ, quæ Spiritus & Oleum simul elevantur ad siccitatem usque facum & separationem Spiritus ab Oleo, ejusdemque Spiritus rectificationem multoties repetitam. Sed hæc in modo agendi suo loco amplissimè dabimus.

*Parisinus Iullii Discipulus corriget Sendivogium, qui à Iullio hoc modo suum Vini Phil. Spiritum rectificare didicit, hoc modo:*

℞. A (*Chaos, Mercurium nostrum Vegetabilem, in quo quatuor Elementa confusa inveniuntur. pag. 271. Vol. sexti Theat. Chym.*) & pone in vase ad distillandum per Y (*Balneum pag. 276.*) & collige in hac destillatione temperata suum, B. (*Spiritum Cœlestem ardentem pag. 269.*) continua illam destillationem cum hoc regimine & modo usque ad signa in nostro apertoriali significata, & usque dum cognoscas quod dictum B sit dissolutum & separatum de natura sua Elementalī, continuando hoc Magisterium usque ad quartam revolutionem. Deinde pone istam Cœlestem materiam igneam in vas purum, & destilla lentè cum igne consueto, & accipe solummodò decimam partem. In secunda destillatione accipe dimidiam partem, & in tertia duas partes de tribus, & in quarta accipe quatuor partes de quinque partibus & ultrà. Tunc accipe postremam illam Aquam Cœlestem & illam ter vel quater destilla cum regimine suprascripto, capiendo totam sine aliqua separatione instituta. Hoc animadvertite, & necessitatem istius Mysterii & Fundamenti admirare, & intelliges qua ratione ignari & crassæ Minervæ homines pessimum panem conficiunt cum Pulchra & Optima farina, quia partem crassam cum subtili componunt; idem præsumptuosus Artificis accidit, qui sibi persuadent se pulchritudinem

nem quintæ Essentiæ nostræ reperire posse cum Spiritu exuberato negligenter depurato absque iusta puri separatione ab impuro. *in Elucid. pag. 230. Volum. 6. Theatri Chym.*

*Quem tamen modum rectificationis tam exactè observare nulla mihi videtur esse necessitas; cum Spiritus rectificatio, quocunque etiam fiat modo, paucioribus vel pluribus cohobationibus satis sit bona, dummodo fuerit separatus à sordibus Vini, quod cognosces, inquit Lullius, quando comburit petiam linteæ propter sui ardorem, hoc est, ut alibi clariùs, donec linteum Spiritu hoc madefactum, si accendatur, consumatur totum.*

*Hic rectificatus Spiritus destillando acuitur Vegetabilibus Oleosis in Recepto denominatis, quorum Olea sibi proxima facillè secum evehit, iisdem imprægnatur, & ariditate in iis contenta acuitur; neque tamen incumbit nobis, ut Vegetabilibus hisce solis, non aliis simul uti liceat: vel necesse sit, hæc omnia insimul miscere, quasi unum vel duo non sufficerent. Oleum cujuscunque Vegetabilis hic nobis satisfaciet, vel ex Vegetabili eductum, ipso mediante Vini Phil. Spiritu: vel jam modo confectum & Spiritui Vini Phil. additum. Unam alteramve formulam pro hujus menstruorum generis confirmatione dabo; cujusmodi est,*

## 6. Aqua Vitæ Paracelsi.

*Descr. p. 508. Tomi I.*

*Re. Alcohol Vini exsiccati libras tres, foliorum Anthos, Marcis, Lavendulæ ana unciam semis; Cubebarum, Caryophyllorum, Cinamomi ana uncias duas; Masticis unciam semis; Storacis utriusque ana drachmam semis; Doronici uncias tres; reduc in septimum Alembicum.*

*Aquam hanc Vini Phil. Spiritu confectam esse, præter Alcohol Vini exsiccati, testatur usus sequens. Re. Foliorum auri No. XX. Margaritarum non perforatarum, Granatorum, Rubinorum ana drachmam semis; reduc ad digestionem per mensem. Hujus Olei accipe grana tria vel quatuor cum Vino malvatico aut Aqua Majoranæ vel Salvix. Menstruum hoc Vinum Essatum vel Essentiatum est; sive Spiritus Vini Phil. Oleosorum ingredientium Essentiis imprægnatus, quo Aurum, Lapidesque pretiosos*

*dissolvit Paracelsus in Oleum sive Elixir nobilissimum, quod arcanum esse ait in superfluitate menstruorum, puta muliebrium. Hujus Aquæ descriptio, quia clara est, alieno lumine non indiget. Proponam igitur aliud Receptum magis obscurum.*

7. Aqua Vitæ Paracelsi alia.  
*Descript. p. 115. Chyr. min.*

Rx. **A**quarum Melissæ, Rosarum, Cheiri, Salviæ, Balsami, ana libram unam; Piperum omnium, Cubearum, Zinziberis, Cinamomi, Masticis, Myrrhæ rubræ, Macis, Caryophyllorum, ana uncias duas, succi mellis libram semis. *Aquæ Vitæ rectificatæ libras quinque.* Digerantur omnia simul per novem dies, & postea separentur & in pellicano destillentur in Spiritum. Tandem ad hunc liquorem adde pomum tostum & fractum & simul unà cum subsequentiis aromatibus digerantur super cineres per tres dies, de qua sumantur grana quinque singulis diebus. *Aromata hæc sunt.* Rx. Cinamomi, Caryophyllorum, Macis, ana uncias duas; Cheiri, Anthos, ana unciam semis; Ambræ drachmas duas; Moschi grana quinque; Zibethæ drachmam semis; Zinziberis, Cubearum, Nucis Moschatae ana unciam unam semis; Amomi drachmas duas; Zedoariæ uncias duas semis; Granorum Paradisi unciam unam semis. Post horum omnium digestionem separa, servaque vasis vitreis obstructissimis.

*Ex ipsa dosi hujus præscriptionis liquet operationem esse merè Philosophicam, quod si enim per Aquam Vitæ intellectum voluisset vulgarem Spiritum Vini, omninò ridiculum fuisset propinare tantum quinque grana pro dosi.*

*Plura hujus generis nobis occurrunt menstrua, quæ tamen, cum paràm à pristina Spiritus Vini Phil. natura recedant, ab Adeptis aliquibus minus fuere observata; idcirco Christophorus Paracelsus, nobilis sculus, hanc non admodum laudat acuitionem Spiritus Vini Phil. Quidam, inquit, acutum fecerunt (prædictum Spiritum) cum Vitriolo, qui modus satis bonus est; quidam cum Nitro; quidam cum Cinnabari; quidam verò cum his duobus; quidam cum omnibus tribus; quidam cum Terra ipsorum;*  
 qui

qui modus mihi displicet, quia hac ratione crassa unctositas & ponderositas introducta fuit. Quidam Vegetabilibus sunt usi, ut sunt Herbae, Radices, Flores, Semina tibi cognita, quae in se potentes Mercurios (*Vegetabiles*) habent; hinc est, quod qui illum hoc modo tractarunt, formam ejus Vegetabilem (*unctuositatem*) potius augmentarint, quam ut magis solubilem reddiderint, *Parissinus in Elucidario pag. 231. Volum. 6. Theatri Chym.*

Hinc est, quod Ripleus Parisini condiscipulus haec pallio Philosophiae tecta esse crediderit; ita enim scribit in sua medulla *Philos.* Raymundus dicit, quod debeat extrahi de morte & fecibus Vini per 120 dies, per continuam rotationem in Balneo calidissimi fimi, & quod acuetur cum rebus Vegetabilibus calidis, ut sunt Piper Nigrum, Euphorbium, Pyrethrum, Anacardus, Squilla, Solatrum, Apium Sylvestre, & hujusmodi similibus; nam sine virtute harum rerum, ut ille dicit, non est sufficiens, dissolvere Metalla, nisi longo tempore, sed ut nihil dubii aut ambigui appareat, dico, quod haec omnia cooperta & tecta sunt pallio Philosophiae. Nam animus illius est, quod in hoc Spiritu habeatur aliud menstruum resolubile, quia sine tali menstruo resolutivo solutio nunquam fieri potest. Et illud menstruum resolubile generatur solummodo ex genere Metallorum, & per menstruum nostrum resolutivum producit in actum.

*Ripleus pag. 168. Medullae Philosophiae.* Ripleus per menstruum resolubile, menstruo resolutivo, (id est, Vini Phil. Spiritu) in actum producit, intellexit aquam quandam mercurialem, de cuius preparatione inferius, ubi similiter patebit per praedicta Vegetabilia, intellexisse Mercurium currentem. Nihilominus tamen Vegetabilia haec aliquando quoque sumpsisse literaliter, sequens ejus probat menstruum.

quod si illud in aqua, muluquo, tingit mercurium hunc, et

8. Aqua Vitae Riplei  
Descriptio p. 338. Viatici

Distillato menstruo à primis fecibus, fiat circulatio ipsius cum speciebus calidissimis, sicut sunt Piper Nigrum, Euphorbium, Pyrethrum, Anacardi, grana Paradisi & hujusmodi,

per



per centum dies in Balneo, & postea destilletur tantum medietas ipsius, & cum illa fac putrefactionem tuam, &c.

*Hic Ripleum sumpsisse Vegetabilia hæc, non argentum vivum, inde patet, quod peractâ Circulatione, Spiritus medietatem tantum, utpote subtiliorem Vegetabilium destillet partem; quo casu istud Metallum, (&) licet dissolutum, remaneret in fundo. Verum ubi Lullius Spiritum acuit destillando, & deinde circulat; Ripleus hoc facit Circulando, & postea destillat. Aliquando huic Aquæ Vitæ Olea addit, sive Essentias vel Metallorum vel Vegetabilium, ut sequitur.*

### 9. Aqua Vitæ Composita Riplei.

*Descripta pag. 343. Viatici.*

**C**irculetur Vinum Rubeum fortissimum cum Vegetabilibus notis per 120 dies, rotatu continuo in Balneo, & postmodum trahatur per destillationem tantum purissimus Spiritus, cui imponatur Oleum Lunæ purissimæ, factum sine corrosivo, & circulentur simul per alios centum dies, & tunc est aqua de natura Basilisci, quia sicut in instanti solo aspectu, Basiliscus hominem interficit, sic Aqua ista impositum ei argentum vivum sine igne alieno quasi subito congelat in argentum optimum; & nota si ignis (Oleum vel Essentia) Chelidonæ imponatur, aut ignis florum Thymi post primam Circulationem, & absque oleo Lunæ simul circulentur decem diebus, multo melius congelabis argentum vivum, &c.

*At, quod majorem parit scrupulum, est ipsius Lullii in hunc locum commentatio. Nolumus, inquit, te ignorare, quod Argentum vivum nostrum (veget.) poteris in alia ratione à sua minera extrahere: Fili, modus est, ut capias herbam, quæ dicitur Portulaca marina, Apium, Squilla, &c. destilla, feces quæ remanent calcina, cum Aqua destillata extrahe Sal, à quo Aquam abstrahe, Sal abstractum aliquoties dissolvendo & coagulando purifica, & habebis Sal herbarum Vegetabilium acuentium; de his intelleximus, inquit, cum dicimus: Acue cum*

cum Vegetabilibus acuentibus, scilicet de istis salibus, non de herbis simplicibus.

*Ex his consequi diceret: Receptum Animæ Metallicæ minimè descriptum fuisse, ut juxta literalem sensum intelligeretur: Sed habeo quod regeram, nimirum, Lullium Vegetabilibus crudis etiam suum acuisse Vini Spiritum, facile probatur ex Distinct. 3. libri Essentiæ, in allegata ab ipso Figura individuorum, ubi individua recenset propinquissima, Spiritum Vini Phil. acuentia, ut sunt Vinum Rubeum, Mel novum, Chelidonia, flos Roris-marini, Mercurialis, Liliū Rubeum, Tartarum, Sanguis humanus, & Vinum Album. Quamobrem hæc, non alia; & hæc tantum elegerit, non meum est respondere: Id quod inde discimus, est, quòd illorum duo præ cæteris nobis commendaverit individua, Tartarum & Mel, de quibus ita: Sunt aliqua individua, in quibus Mercurius (Vegetabilis) liberum habet actum aliqualem, in Tartaro unam habet liberam operationem solummodo, & in Melle duas, & hoc artificem scire oportet, ut certificetur in hac arte, & ejus prima veritate.*

*Tartarum præfert, non Tartari sed Alcali inde confecti gratiâ, idque ceu alcalium optimum resolvit per deliquium, purificatumque unâ cum Vini Phil. Spiritu circulat, juxta Doctrinam in Tabula individuorum prima præscriptam; in secundo Experimento, aliisque in locis. Alcali Tartari locum supplere possunt Alcalia ex Melle, Chelidonia, cæterisque à Lullio denominatis individuis, quibus etiam Adeptos suum aliquando acuisse Vini Spiritum, monstrabitur inferius in sexto Menstruorum genere. Sed & hæc faciunt contra literalem sensum nostri Recepti, probantque Vegetabilium salia, non eadem ipsa cruda accepta fuisse in Recepto. Ast etiamsi Tartarum elegerit propter alcalium fortissimum inde præparandum, non eandem tamen ob causam Chelidonium, flores Anthos, Mercurialem, Liliū Rubeum, & Sanguinem humanum cæteris præstare intimavit, siquidem cum his alio procedit modo: Separat enim ex iis cum Spiritu Vini Phil. Elementa, ex quibus ignem sive Oleum recipit tantum, quod cum Spiritu circulat, eumque sic acuit, ut ex Tabula individuorum secunda satis clarè patet.*

*Mel verò quoniam non tantum collateralia sua præcedit Individua, sed & Tartarum ipsum, (nam Spiritum Vini in Tartaro unam dixit: Sed in Melle duas habere liberam operationes)*

*inde*

inde etiam Melli suam peculiarem attribuit processum, destillando videlicet totum favum, Mel simul cum cera, mediante Vini Phil. Spiritu, per Alembicum.

Jam inter utrumque Mellis & reliquorum individuorum processum medium tenet locum Receptum nostrum. Mel si volatilifetur quoad totam substantiam, inde fit Magisterium, quod Spiritui Vini Phil. conjunctum, Menstruum nobis exhibet tertii generis. Ignes verò sive Olea ex Chelidonia, floribus Anthos, Vino Albo & Rubeo communi, &c. per separationem Elementorum mediante Vini Spiritu facta, Essentia sunt, quae Spiritui Vini additæ, illum non alterant, sed multiplicant potius, quia Essentia Essentia additur, nimirum secundarius primario Spiritui Vini Phil. sed si Chelidonia, flores Anthos, ut & Vegetabilia Recepti nostri destillentur cum Vini Phil. Spiritu, is spreto ariditate, eorum extrahit & secum elevat omnem unctuositatem; Mellis autem crudi magis simplicem tantum, subtilem, volatilem, particulisque aridis minus gravidam; adeoque id circulando cum Spiritu Vini Phil. Magisterium fit quidem, magis tamen ad Essentia naturam accedens, eoque minus aridum, & minus Spiritum Vini alterans, quam istud ex Melle, ideoque merito cum prædicto Spiritu jam unitum, conficit Menstruum à tertii generis Menstruis diversum. Sic immotus hætenus persistit literalis nostri Recepti sensus. Sed ne derogemus authoritati Authoris, sui que ipsius Commentatoris Lullii, supponere necesse est, eum Destillato Vini Phil. Spiritu desuper Vegetabilia prædicta, aliquando ex residuo per calcinationem præparasse Alkali, eoque suam acuisse Spiritum, & ita confecisse menstruum quinti generis.

Ex hisce & hujusmodi Receptis annotamus,

1. Vinum, Lunarium, Nigrum nigrius nigro, materiam Menstrui Mercurii Vegetabilis sive Animæ Metallorum non esse Vinum commune sed Philosophicum; nec hujus Vini Spiritum esse Aquam ardentem vulgi, sed Philosophorum.
2. Menstruum hujus generis esse unctuosum Vini Phil. Spiritum, communi Oleorum Vegetabilium unctuositate acuatum, id est, temperatum. Spiritui Vini Phil. commisce commune aliquod Oleum destillatum, digere, destilla, & habebis Menstruum secundi generis multo citius, imò idem extempore conficies, si misceas Vini Phil.

*Phil. Essentiam ( Spiritum ) cum Oleo alicujus Vegetabilis Magisterio.*

3. *Ex tot Vegetabilibus unum sufficere Oleosum ( Crocum vel Macem ) pro Spiritu Vini Phil. acuitione. Nec errabis tamen, si reciperes Theriacam; qui Spiritus Theriacalis hoc Vini Spiritu confectus, Menstruum esset hujus generis.*

4. *Menstrua hæc esse Medicamina.*

5. *Menstrua hæc ex meris Vegetabilibus confecta, proprie dici Menstrua Vegetabilia, hinc etiam ea, quæ Menstrua Vegetabilia composita nominavimus, ob Metallorum vel mineralium additionem, aliquando ab Adeptis vocata fuerunt menstrua mineralia. Ita Lullius in Experimento 34. suum Circulatum majus ex Auro & Argento confectum, verum Menstruum minerale vocat. Nos verò ea à mineralibus menstruis distinguimus, quoniam hæc corrosiva sunt, utpote salium mineralium aciditate præparata. Ista verò dulcissima sunt absque omni corrosivo, & dissolvenda suaviter dissolvunt.*

6. *Menstruum dici Animam Metallorum. Anima diversimodè sumitur apud Adeptos.*

*Primò pro Metallo perfecto, Auro vel Argento. Sic Arnoldus in flore florum: Philosophi Animam dicunt fermentum, & hoc idè, quia sicut Corpus humanum absque suo fermento seu ejus anima nihil valet, ita est in proposito; Nam fermentum est Corpus, quòd in naturam suam alia convertit. Et scias, quòd non est fermentum, nisi Sol & Luna, hoc est, aurum & argentum istis planetis appropriata, &c. Oportet ergò fermentum in Corpus introduci, quia est ejus anima. Hoc est, quod dixit Morienus: Nisi Corpus immundum mundaveris, & id dealbatum non reddideris, & in eo animam non miseris, nihil huic Magisterio direxisti.*

*Secundò pro Metallis, aliisque rebus, menstruo Phil. volatilifatis. Sic Lullius aurum & argentum volatilifatum in præparatione sui Circulati majoris, Menstruum vel Spiritum animatum nuncupat: R. Spiritum, inquit, animatum Solis, & Spiritum animatum Lunæ, simul conjunge, &c. Sic non tantum Tincturas auri & argenti menstruo volatilifatas dixit animam; sed etiam Metallorum imperfectorum. Sic in 20 Experimento habet aquam animale Saturni, in 21 Exper. Martis animam. Imò ex omnibus rebus separans Elementa, liquores tinctos destillatas*

E

vocat

vocat animas five Spiritus animatos, eò quòd hisce Terra mortua sicca & fixa, iterum reviviscatur, volatilisatur, & reducit in Sal harmoniacum. Vide revivificationem salis Tartari mediante propria Aqua, in volatilisatione ejus data in 2 Experimento.

Tertio pro Menstruis ipsis. Menstrua enim sunt Metallorum animæ, quibus Metalla, aliàs mortua, animantur & reviviscantur; ita Lullius de hoc nostro Menstruo, Metallorum anima, pag. 195. Comp. animæ Transm. Aliter, inquit, Metalla non possunt dissolvi, nisi animentur cum Menstruo Vegetabili, cujus potentiâ fit resolutio in rebus dissolubilibus. Et in Elucid. Testam. pag. 145. Aqua Vitæ est anima & Vita Corporum, per quam noster Lapis vivificatur, sic etiam Ripleus in Libro Mercurii pag. 108. Ait: Sperma Metallorum etiam Aqua Vitæ Metallica dicitur, quia Metallis ægris & mortuis vitam & sanitatem præbet, &c.

Quarto pro unctuositate tam Metallum quàm Menstrui. De utraque Ripleus pag. 150 medullæ Phil. Est quædam, inquit, similitudo Trinitatis, elucescens in Corpore, Anima & Spiritu. Corpus est substantia Lapidis, Spiritus est virtus, (hoc est quinta Essentia, quæ excitat naturas de Morte.) Anima verò pro fermento accipienda est, quod haberi non potest nisi ex perfectissimo corpore (Auro) similiter in Sulphure (auri) est terrestreitas pro Corpore, & in Mercurio (Menstruo) serenitas ærea pro Spiritu, & in utrisque naturalis unctuositas pro anima. Nam omnia sunt in unctuositate Corporis fermentabilia, commixta & inseparabiliter illi unita per minimas sui partes, utpote ex qua anima Lapis formatur, quia ea absente, nullo modo formari potest.

7. Menstruum dici Mercurium Vegetabilem, ortum à Vino rubeo vel albo. Adepti plures habent Mercurios.

Primus est Argentum vivum vulgi, currens vel sublimatum.

Secundus est Mercurius currens corporum, è Metallis eductus, Spiritus Vini Phil. medio.

Tertius est Sal Alkali quodvis, præsertim Vini Phil. Spiritu fixatum.

Lullius chelidoniam calcinat, & inde sal extrahit de quo ita: Hoc magisterium itera toties, quousque totum inde salem extraxeris, quæ est pars mercurialis istius individui (chelidonie)

His

His ergò peractis accipe omnes illas dissolutiones (*Lixivia*) quas per filtrum vel lineum pannum transmittè, ut à terrestreitate purgentur; Deinde per Balneum congelabis destillando, Et transacta humiditate in fundo vasis remanebit Mercurius sive sal albi coloris, atque hoc pacto ex hac materia Mercurium extraxeris, qui virtutes propè innumerabiles habet acuendi Spiritum Vegetabilem à Vino (*Phil.*) extractum, ut potestatem habeat dissolvendi cuncta Metalla cum conservatione formæ vegetativæ & germinativæ.

In magia Naturali *Tartarum calcinatum*, & quater destillando imprægnatum menstruo Vegetabili, deinde per deliquium resolutum & coagulatum, Mercurium vocat. Et habebis, inquit, pag. 379. *Sal artis*, sive Mercurium Testamentarium sine quo nihil fit. Aliquando sal sive caput mortuum, in separatione Elementorum dictum Terra exanimata Mercurium vocat. Sic in Exp. 6. Terram inanimatam urinæ, aquâ dissolutam, filtratam & coagulatam, Mercurium vocat. Tunc servato, inquit, salem nostrum armoniacum fixum, Sulphur animale nostrum, Mercurium animale nostrum, de quo pauculum quid super laminam igneam colloca, & si fluat tanquam cera sine fumo, signum est te habere Argentum vivum fixum ac perfectè depuratum, cum quo plurima experimenta haurire poteris. Hic est ille Mercurius, qui aptissimum nobis subsidium præbuit.

Quartus Mercurius est vel Vegetabilis vel Animalis; de quo Ripley in Pupilla pag. 300. Sunt plures, inquit, Mercurii, quàm hi supradicti duo (*minerales Leo rubeus & viridis*) videlicet Mercurius Vegetabilis & Animalis, quoniam uterque extrahi potest ex quibusdam liquoribus, veluti ex Sanguine & ovis. Lullius Distinct. 3. Libri Essentiæ in Figuris vel Tabulis Individuorum describit Vegetabilia & Animalia, in quibus reperiuntur hi Mercurii propinquissimè. Est tandem, inquit, hoc aliud secretum Naturæ, ut Artista hujus artis cognoscat & reverà habeat notitiam de individuis, in quibus noster Mercurius est repertus propinquissimè. Quare sciant Artistæ hujus artis, in omni Elementato nostrum Mercurium reperiri, tamen in aliquibus tam longè, ut vitam hominis anticiparet; antequam Artista hujus artis ipsum, pro ut expedit, extractum possideret. Quare in ista Figura revelamus illa, quæ ipsum propinquissimè possident. De hoc Mer-

curio *Lullius* Libro Mercuriorum pag. 8. Quando, *inquit*, dicimus Mercurium communem, dicimus de illo, quem Philosophi intelligunt, & quando dicimus vulgarem, loquimur de illo, quem Rusticus intelligit, & qui venditur in Apothecis. Quod *Ripleus* pag. 326. suæ Concordantiæ ita exprimit. Cum loquor de Mercurio intellige Mercurium magis communem quam communem.

*Quintus est ipse Vini Phil. Spiritus, quem Lullius in Exp. 3: Mercurium Vegetabilem nuncupat. Ita habebis, inquit, salern Vegetabilem, extractum ab hoc individuo (Melle) quod sal est pretiosissimum, ac potestatem habet acuendi Mercurium Vegetabilem, & dissolvendi duo luminaria, &c. In Exp. 5. ex Portulaca, Apio, Squilla, &c. Salia præparat, quibus omnibus, inquit, Mercurium Vegetabilem ex Vino extractum acuere poteris conjunctim vel separatim, de quibus inferius in sexto menstruorum genere.*

*Sextus est Menstruum Philosophicum, menstruum enim nostrum dicitur Mercurius Vegetabilis, ortus à Vino Albo vel Rubeo.*

*Septimus est Spiritus animatus cujuscunque corporis, sive Aër in separatione Elementorum, qui Mercurius, utpote ignis sive Oleum, Sulphur dicitur in omnibus ferè Receptis.*

*Octavus est Sal Harmoniacum Vegetabile vel Animale vel Minerale, Sulphur naturæ, quod etiam Mercurius noster, Mercurius sublimatus & Mercurius Philosophorum dicitur. Hæc ut in sequentibus menstruorum descriptionibus observemus, necesse est, nisi cum nominibus res ipsas quandoque confundere velimus.*

III. Genus.